

四庫全書

集部

欽定四庫全書

集部

劔南詩稿卷

四十八至
五十一

詳校官庶吉士臣陳若霖

主事臣呂雲棟覆勘

總校官檢討臣何思鈞

校對官修撰臣戴衢亨

謄錄監生臣楊浚明

欽定四庫全書

劔南詩藁卷四十八

宋 陸游 撰

縱筆

莫笑畸翁迫耄期從來不許俗人知
繫船慣聽巴東雨畫策曾從渭北師
袖劔客同樓上醉爛柯人看洞中碁
如今更欲滄溟去鯨浪浮天信所之

又

常笑相如賦上林肯為子政鑄黃金心光自發誰能障
踵息無聲不厭深搖齒復牢堪決肉枯顱再茁已勝簪
老松澗底雖終棄霜雪元知不解侵

又

拖得烏藤到處行看山看水眼猶明但期少健遊潼華
豈必長生似老彭一緬青鞵吾事了半甌綠酒萬緣輕
安知不作希夷叟生長兵間老太平

予生于宣和末遇
世難間闕東歸又

避地
數年

又

未說無功爵位叨昔人所畏在功高印如斗大寧常保
劍拄頤長祇自勞酒社極知身可隱獵場猶得氣差豪
世間見透渾無事狐貉安能詫緼袍

村興

折花持博酒種菜賣供家請藥人何壅爭棋客正譁漁
翁足蹠踈牧豎手丫叉短景匆匆晚橫林又宿鴉

賽神

歲熟鄉鄰樂辰良祭賽多荒園拋鬼飯高机置神鵝

村人

謂祭神之牲曰神猪神鵝

人散叢祠寂巫歸醉臉酡飢鴉更堪笑鳴

噪下庭柯

小立

紅樹園廬晚碧花籬落秋荒陂船護鴨斷岸笛呼牛酒
賤村村醉山寒寺寺幽聊須岸烏幘小立埭西頭

窮老

窮老寧須歎吾生得已多風埃棄朝幘煙雨弄漁蓑富

屋烏爰止閉門爵可羅人生只此是得酒且高歌

晚步舍東

籬槿花開柿葉丹土溝東去過牛欄
艸煙漠漠天將暮
布褐蕭蕭客正寒

述野人語

白米乾薪好井泉甘餐美睡若登仙
從來不慣嘗鹽酪
席下何須有一錢

又

重重大布敵風霜籬外桑陰五月涼軟飯一盂千萬足
那知世有郭汾陽

戲畬野人

日飲雲根一脉泉知君骨相自應仙曲肱閒卧茅簷下
買斷南山不用錢

又

木葉凋疎天欲霜老懷多感易淒涼得君數語開人意

徑就湖橋醉夕陽

湖橋有村
店酒甚美

建安陳希周官海南為予致兩拄杖其一促節竹

其一枕榔也

雨漬嵐侵蘚暈重石砮楷矢正相同取從萬里鯨波路

來伴三山鶴髮翁雪

一作雲

上有時留醉草花前隨處打

殘紅化龍徑去吾何憾且與人間作歲豐

排悶

棄官謂逍遙勞苦殊未既荒疇須墾闢破屋欠塗墍疾
深藥難求食盡穀暴貴安能作經營但覺睡有味秋高

霜露逼更苦薪炭費雖云未遽死飢凍亦可畏頗思從
李廣小獵聊吐氣復恐灞亭歸邂逅逢醉尉

九月十二日折菊

黃菊芬芳絕世奇重陽錯把配萸枝開遲愈見凌霜操
堪笑兒童道過時

表姪江垌種竹名筠坡來求詩

奉常遺緒冷如秋閉戶知君頗好修千里可嗟妨晤語
兩書猶喜免沉浮但令有竹能醫俗何患無天可寄愁

一事却須常自勉勿容凡子得同遊

微雨

晡後氣殊濁黃昏月尚明忽吹微雨過便覺小寒生樹
杪雀初定草根蟲已鳴呼童取半臂吾欲傍堦行

秋晚寓歎

荷葉枯已盡菊花殘更香帶醒嘗野橘和夢聽啼將鬢
畔流年速燈前舊話長寒龜且未死不必恨搢牀

又

野處仍多病經年無與遊僧庸幾市井醫傲過公侯不
睡愁逢夜無衣怯到秋一端聊自慰問事有長頭

又

幽夢難呼覺孤愁雨滴成天高那可問年往若為情孱
敵猶遺育神州未削平登高西北望哀涕對誰傾

又

老歎交朋盡閑知日月長著書終覆瓿得句漫投囊霜
樹昏鴉黑風簾小蝶黃村醪如水薄也復畲年光

又

十里丹楓岸三家小麥村山多妨極目秋晚易消魂火
舉船過埭人行犬吠門窮愁已如許那更雨昏昏

又

行年垂大耋久矣少朋儔舊事同誰說新詩或自誚廢
書眠過日泥酒醉經秋遲速皆當死時來莫預愁

秋晚湖上

已過西成賽廟期家家下麥不容遲夕陽遍野人歸後

秋水生灘鷺集時靈藥不治懷抱惡好詩空益鬢毛衰
從來未識蘇司業愁絕西風滿酒旗

縱遊歸泊湖橋有作

西蜀東吳到處遊千巖萬壑獨吾州短篷載月娥江夜
小蹇尋詩禹寺秋村酒可賒常痛飲野人有興即相求
何由喚得王摩詰為畫湖橋一片愁

九月十八日至山園是日頗有春意

烏藤真好友伴我出荆扉落葉紛如積鳴禽暖不歸露

濃松鬣長土潤木苗肥未盡幽尋興還家趁夕暉

明日又來天微陰再賦

烏桕赤于楓園林九月中天寒山慘淡雲薄日曛曨旋
摘分猿果寬編養鶴籠身閒足幽事歸卧莫匆匆

又

河岸風檣遠村陂牧笛長短籬圍鹿眼幽徑繚羊腸照
水鬚眉見搓橙指爪香衣裘又關念礎杵滿斜陽

雨後至近村

夜雨曉方止朝雲猶作陰山餘一寸碧溪長半篙深卧
泛白鷗渚行穿黃葉林老農能共語真率會人心

又

年耄身猶健秋高疾已平隣翁思問訊蔬圃要巡行竹
杖輕無迹芒鞋捷有聲相逢無別語努力事冬耕

雨復作自近村歸

夜聽蕭蕭未漲溪朝行漚漚已成泥可憐鳩取招麾速
誰似雲知出處齊野菊枝長半狼籍江楓葉落正淒迷

行人也識龜堂老小榼村醪手自攜

雨寒戲作

掃園收榭葉培地甃塼爐幸有藜烹粥何慙紙作襦
衡門晚眺

幽居端似玉川生茅屋支撐不更營青旂荒寒增酒興
錦囊零落負詩情殘蕪色襯斜陽遠落葉飛如野鳥輕
徂歲崢嶸忽如許雁來又過會稽城

不寐

麗譙聽盡短長更幽夢無端故不成寒雨似從心上滴
孤燈偏向枕邊明讀書有味身忘老報國無期涕每傾
敢為衰殘便虛死誓先鄰曲事春耕

示子虞

好學承家夙所奇蠹編殘簡共娛嬉一婚倘畢吾無累

吾今年為一子自蜀歸
者聘婦無復婚嫁之責

三釜雖微汝有期

子虞明秋當赴句金

聿

弟元知是難弟德兒稍長豈常兒要令舟過三山者弦

誦常聞夜艾時

弊廬

弊廬雖陋甚鄙性頗所宜歌傾十許間草覆實半之確
聲隔柴門績火出枳籬縛木為羸牢附垣作雞埒黃犢
放林莽蒼鵝戲陂池傭耕食于我客主同爨炊瓦盎設
大杓殖莧羹園葵一飽荷鋤出作勞非所辭上以奉租
賦下以及我私有錢即沽酒阡陌恣遊嬉亦有扶持者
婢跣奴髻椎欲畫恨無人後世考此詩

予未冠即交諸名勝今無復在者感歎有作

早歲鄉閭接勝流老來零落歎山丘
欲尋共語人難得却是封侯印易求
數酌不能成兀兀一枰且復寄悠悠
世間只有身差重惆悵今年盡白頭

夜雨

吾詩滿篋笥最多夜雨篇四時雨皆佳
莫若初寒天紙帳白于氈紙被軟于綿
枕傍小銅匱海沉起微煙是時聞夜雨
如絲竹管弦恨我未免俗吟諷勤雕鐫
南朝空堦語妙出建安前意謂奪造化
百世莫比肩安知梧桐

句乃復與竝傳夜雨何時無奇語付後賢

題嚴州王秀才山水枕屏

我行天下路幾何三巴小益山最多翠崖青嶂高嵯峨
紅棧如帶縈巖阿下有駭浪千盤渦一跌性命委蛟鼉
日馳三百一烏騾雪壓披氊泥滿鞢驛亭沃酒醉臉酡
長笛腰鼓雜巴歌大散關上方橫戈豈料世變如翻波
東歸輕舟下江沱回首歲月悲蹉跎壯君落筆寫岷嶓
意匠自到非身過偉哉千仞天相摩谷裏人家藏綠蘿

使我恍然越闕河熟視粉墨頻摩挲

小飲示座中

鏡裏蕭蕭兩鬢衰閑人正與老相宜誰知剪燭焚香夜
恰是搓橙破橘時莫道閉門無逸氣尚能為客誦新詩
君看江海寬多少是處皆堪理釣絲

搖落吟

素秋欲盡風雨惡千林如掃俱搖落年運而往秋復冬
念念元知已非昨癡人顧欲吝此生放翁憫汝笑絕纓

髮毛爪齒俱外物天地大化終無情我貧無以遺兒子
惟有一言持付爾仕宦要能當百挫為農飢死無游惰

插花

有花君不插有酒君不持時過花枝空人老酒戶衰今
年病止酒虛負菊花時早梅行可探家醞綠滿卮君不
強一醉歲月復推移新詩亦當賦勿計字傾歌

雨過行視舍北菜圃因望北村久之

疏畦躡屐愜幽情檢校園丁日有程得雨尚慳須灌溉

我來時聽桔槔聲

又

吳牛齧草卧斜陽
烏白青紅未飽霜
急趲路乾來寓目
十分閑事却成忙

居三山時方四十餘
今三十六年久已謝事而連
歲小稔喜甚有作

自問湖邊舍衰殘
俛仰中謀身悲日拙
造物假年豐稅
足催科靜禾登
債負空社醅
邀里巷腩肉飫
兒童衣及

霜晨贖爐先雪夜紅陂塘趨版築垣屋訖宮功盜息時
雍象人淳太古風退夫無一事鼓缶伴鄰翁

幽居

百事徒勞無一成幽居偶得稱幽情傍籬叢枳寒猶綠
遶舍流泉夜有聲飢坐炮燂多巨粟醉歸懷袖有新橙
愛閒自是從來癖敢竊區區納祿名

予自儀曹罷歸十年不出戶乃請挂

冠

曉晴肩輿至湖上

多稼如雲穫併空牛闌樵擔畫圖中梧桐已逐晨霜盡
烏白猶爭夕照紅脫網唼喁犇遠浦避鷹撲握保溪叢
旗亭人語燈初上一醉何妨野老同

戲作野興

省事貧猶富寬懷客勝家充虛一簞飯遣睡半甌茶有
興閒垂釣逢歡醉插花皋橋亦可死處處是生涯

又

擾擾亭中客悠悠局上棋所遭元有命自苦竟何為馮

衍深尤婦陶潛過責兒奇文雖可貴寢語豈非癡

又

久已挂吾冠江邊歲又殘心惟無媿怍身取不飢寒小酌三杯足安居一席寬東岡有泉脉攜杖試尋看

又

今年病微減耕稼樂江村燈火耿破屋歌呼圍老盆常時但葵菹盛饌有雞豚客散茅簷寂蹒跚自閉門

又

出戶語鄰叟與卿同一愚逢人即如舊臨事不勝迂髮
白花猶插囊空酒亦沽回思五十載何處有榮枯

又

有酒皆堪醉無山不可廬遂初成近賦孤憤悔前書湘
寺分經帙廬山寄藥鉏江頭霜葉滿詩興屬騎驢

道室書事

榻上一琴橫中函太古聲丹砂燒已死芝草種初生道
勝魔軍破方靈疾豎平明朝有蜀使細字報青城

行飯至潮桑堰東小市

飽食無營是處遊偶然來到埭東頭芒鞋也似雙鳬快
漁艇真如一葉浮樵擔行歌衝暝色酒旗遮路賣新篛
任朱二老今安在歎息黃茅擁故丘

任朱皆居堰旁與予同乙巳生今死

矣

負日戲作

困來兩背似膠黏底怪吳人號黑甜安得他生不識字

朝朝就日卧茅簷

世傳楊大年見老兵負日不覺曰快活因問汝識字否對曰不識大年曰

如此更
快活也

遊西村

昨夜雨多溪水渾不妨喚渡到西村出遊始覺此身健
無食更知吾道尊藥笈可賒山店酒筇枝時打野僧門
歸來燈火茅簷夜且復狂歌鼓盎盆

初冬

平生詩句領流光絕愛初冬萬瓦霜楓葉欲殘看愈好
梅花未動意先香暮年自適何妨退短景無營亦自長

況有小兒同此趣一窗相對弄朱黃

遣懷

寬袂新裁大布裘低蓬初買小漁舟
舊交只有青山在壯志皆因白髮休
漫道卧熊吞貉子安能浙米向矛頭
山園芋栗秋方熟一飽今知本易謀

策杖

山翁老病入腰臀坐覺諸兒行步犇
暫出衡門須策杖千回上樹更堪論

汲東山下井

從來耽酒須微祿絕祿三年酒盞疎百尺
轆轤新浚井
一杯聊慰渴相如

園中作

誰采枕榔寄一枝北來萬里為扶衰風光最愛初寒候
懷抱殊勝未老時閒引微泉成曲澗盡除枯蔓補疎籬
花前自笑童心在更伴羣兒竹馬嬉

又

病侵衰境頻須藥日漏寒雲旋作晴幽鳥喚回殘枕夢
蠻童扶下野堂行書生本自安窮處豐歲何妨樂太平
新買西村兩黃犢閒招隣曲議春耕

園中

霜凋欒柳枝無葉風折安榴子滿房冬日園林元自好
老人懷抱自多傷

短篷

射的山前繫短篷快如魚鳥出池籠試臨清鏡枯顱茁

不待丹砂兩頰紅
遂妄百年真自苦
造微一日有餘功
不須更說岷峨約
已覺蓬壺在眼中

自適

遠遊思里巷
久困念耕桑
家釀傾醇碧
園蔬摘矮黃

小槽

用菜豆麴矮黃吳中菜名

利名因醉遠
日月為閒長
今歲雖中熟
吾

徒亦小康

堂東小室深丈袤半之戲作

小室舍東偏
滿窗朝日妍
研池生細浪
香岫起微煙
欲

極圖書樂少須冰雪天猶勝禪榻上僅僅占三椽

禪僧自謂

三條椽下
六尺單前

獨處

蓬門終日閉寂寂少人聲納祿知身貴傳家覺責輕朝
餐烹芋糝夜坐藝松肪刻却彈棋局此心如砥平

又

白纒敷牀穩烏藤倚壁斜灰深惟畫字燈暗不成花似
客猶居里如僧未出家孤村夜無月何事有啼鴉

探梅至東村

乞得殘骸已累年
柴車破弊不堪懸
閒愁正要供詩思
小疾何妨省酒錢
忍事漸多心混混
貯書雖少腹便便
今朝偶有尋梅興
春色爭來拄杖前

讀史

青燈耿耿夜沉沉
掩卷淒然感獨深
恤緯不遑痿婦歎
美芹欲獻野人心
孤忠要有天知我
萬事當思後視今
君看宣王何似主
一篇庭燎未忘箴

漁翁

船入蘆花日暮時
雙瞳炯炯鬢如絲
世間豈少磻溪叟
老向煙波人不知

又

丈叔君房兩故人
可憐俱作白頭新
桐江歸伴隣翁醉
一笑相看意却真

寓言

濟劇人材易扶顛
力量難為謀須遠
太守節要堅完氣

與秋天杳胸吞夢澤寬方知至危地自有泰山安

又

出仕謝招麾還家美蕨薇深居全素志大路息危機世
變生呼吸人情忽細微牀頭周易在捨此欲安歸

又

山海三家市風煙五畝園藜羹均玉食茅屋陋朱門耕
釣此身老乾坤吾道尊故交淪落盡至理與誰論

夜四鼓睡覺起行簷間觀新作南籬

星斗闌干天宇清
起披短褐繞廊行
葉聲颯颯飛霜重
籬影疎疎落月明
沙冷斷鴻投別浦
風高殘漏下孤城
衰遲自笑情猶在
一首新詩取次成

客去追記坐間所言

征西幙罷幾經春
歎息兒音尚帶秦
每為後生談舊事
始知老子是陳人
建隆乾德開王業
溫洛滎河厭敵塵
倘得此生重少壯
臨危敢愛不貲身

疇昔

行路悲疇昔驅車每戴星數殘雙隻堆歷盡短長亭飛
蓋交迎餞聽歌半醉醒至今湖海夜猶夢隴山青

飲牛歌

門外一溪清見底老翁牽牛飲溪水溪清喜不污牛腹
豈畏踐霜寒墮趾舍東土瘦多瓦礫父子勤勞藝黍稷
勿言牛老行苦遲我今八十耕猶力牛能生犢我有孫
世世相從老故園人生得飽萬事足捨牛相齊何足言

牧羊歌

牧羊忌太早太早羊輒傷一羊病尚可舉羣無全羊日
高露晞原草綠羊散如雲滿川谷小童但搯竹一枝豈
必習詩知考牧

生日子聿作五字詩十首為壽追懷先親泣然有

作

十月十七日

我生尚及宣和末頌厯頻驚歲月移負米養親無復日
蓼莪廢講豈勝悲渡江百口今誰在抱恨終身祇自知
文字虛名何足道樽前媿汝十章詩

園中書觸目

氣候今年晚濃霜始此回殘梧未全槁晚菊有初開烏

柏先楓赤寒鴉後雁來西窗夕陽暖摘橘薦新醅

烏柏未霜

而葉丹寒鴉必得霜乃至

養生

武丁命傳說治國如和羹天亦命放翁用此以養生抑
過補不足輔相其適平千歲汝自有不必師廣成

齋中雜興

八十頽齡安所歸蕭然終日掩柴扉
清心始信幽棲樂窮理方知俗學非
山果滿筐猿食足石泉通笕藥苗肥
衰翁莫道渾無事掃葉歸來又落暉

又

倒掩衡門手自關老身著在亂書間
有詩尚作清宵祟無事能妨白日閒
薄算上樓聊試步經旬止酒自醺顏
兒曹莫笑衰翁嬾擬遍淮南大小山

江上

禹會橋頭江渺然隔江村店起孤煙冷雲垂野雪方作
斷雁叫羣人未眠萬里漂流歸故國一生蹭蹬付蒼天
暮年尚欲師周孔未遽長齋繡佛前

追憶征西幙中舊事

大散關頭北望秦自期談笑掃邊塵收身死向農桑社
何止明明兩世人

又

小獵南山雪未消繡旗斜卷玉驄驕不如意事常千萬

空想先鋒宿渭橋

又

憶昨王師戍隴回遺民日夜望行臺不論夾道壺漿滿

洛筍河魴次第來

在南鄭時關中將吏有獻此二物者

又

關輔遺民意可傷蠟封三寸絹書黃亦知敵法如秦酷

列聖恩深不忍忘

關中將校密報事宜皆以蠟書至宣司

冬夜

颼颼黃葉欲辭枝
況著霜風抵死吹
投老難逢身健日
讀書偏愛夜長時
孤村月白聞衣杵
破竈煙青煮芋糜
不是用心希陋巷
為儒自合耐寒飢

冬日

室中恰受一蒲團
也抵三千世界寬
上策莫如扃戶坐
苦閒猶復取書看
蔬飯輒枝梧老窗
白爐新準備寒
堪笑此翁幽獨慣
却嫌兒女話團圞

冬朝

風入園林徹夜鳴曉看黃葉與階平
篝爐火著衣初暖
爨釜新乾粥已成潔已工夫先盥頰
正心事業始冠纓
聖賢雖遠詩書在殊勝隣翁擊磬聲

釋氏謂銅鉢為磬

冬算

曉角昏鐘為底忙豈容老子更禁當
乘除富貴惟身健
補貼光陰有夜長臨水小軒初見月
滿庭殘葉不禁霜
巴江尺素何時到剩著新詩寄斷腸

張梓州書久不至

風月

鏡中日日鬢毛衰八十還思七十時風月不知人意緒
酒醒夢斷又催詩

落葉

萬瓦清霜伴月明卧聽殘漏若為情無端木葉蕭蕭下
更與愁人作雨聲

邠風

少學詩三百邠風最力行春前耕犢健節近祭猪鳴簷
日桑榆暖園蔬風露清金丹不須問持此畢吾生

擁爐不出輒終日自嘲

柴門木落葉成堆十日元無一再開
書坐藏多為飽崇詩緣吟苦作窮媒
兒言山圃當收粟僧約溪橋共探梅
堪笑此翁推不動地爐無火畫寒灰

嘲梅未開

梅蘂如紅稻中藏無盡香何時來鼻境
更待幾番霜

劔南詩藁卷四十八

欽定四庫全書

劔南詩藁卷四十九

宋 陸游 撰

自嘲

僻學論交少貧居卜地偏
不逢方謝事垂老旋希僊
兀兀醒如醉昏昏晝亦眠
却慚農與圃一飽餞餘年

解嘲

一壑棲遲久多生習氣消
行藏無媿怍夢覺兩逍遙
倩

鶴傳山信疏泉洗藥苗晚來幽興極乘月過溪橋

野興

晨炊畬粟薦園蔬默計生涯已有餘舉世方誇稽古力
滿懷空貯活人書悶呼赤腳行沽酒出遣蒼頭旋僦驢
不為歸休習疎嬾愛閒元與市朝疎

枕上

送盡小窗月數殘孤戍更清詩時自至幽夢久方成衣
杵斷還續燈花落復生細衾賸得暖紙帳不知明

遠遊

老子平生喜遠遊
流塵不惜闔貂裘
江亭吹笛三巴夜
關路騎驢二華秋
但使澄心同止水
自知幻境等浮沤
悠然飽聽松風睡
勾漏丹砂底用求

晚遊

垣屋參差出溝谿
曲折通亂鴉空際黑
落日竹間紅
輶輿竿語搖搖播
脚風吾行本無定
隨意入空濛

夜坐

流落知聞絕歸休寵辱空酒狂寧限老詩思正須窮活
火生新焰殘燈委碎紅平生會心處正在兀然中

酒熟醉中作短歌

陸子壯已窮百計不救口蜀道如上天十年厭奔走還
鄉困猶昨負郭無百畝雖云飢欲死亦未喪所守虛名
一畫餅陳迹幾芻狗但思從壯士大獵雲夢藪長戈白
如霜爛漫載牛酒箭穿乳虎立車轉蒼兕吼歸來數禽
獲毛血灑戶牖人生貴適意富貴安可苟

冬夜讀書有感

落葉殘蕪又一冬
老人光景易怱怱
不論病惰耕桑業
但恨貧分學問功
馬昔騰驤離冀北
鶴今憔悴返遼東
六經未與秦灰冷
尚付餘年斷簡中

散步湖上至野人家

湖上霜高水落時
一藤信步出尋詩
妄誇強健真堪笑
喚作清閒亦自欺
西埭又隨牛迹去
東村常望鶴巢知
漁翁留客頻辭謝
雞瘦難烹酒味漓

對食戲詠

瘦榼傾桑落，毫杯點雨前。
冰梨頗似頰，霜栗大如拳。
洗脯烹蔬甲，攜鉏斲筍鞭。
餘年只此是，切勿念腥羶。
昨非

溫飽從來與道違，書生只合卧牛衣。
老孤五百生前錯，孤鶴三千歲後歸。
舌自生肥勝玉食，腰常忘帶況金圍。
一官彭澤曾何有，元亮還家悔昨非。

遂初

貧士善用短屏居常自如出尋鄰叟語歸讀古人書過
店亦沽酒登山時跨驢非關傲塵世聊欲遂吾初

小雨偶出隣里小兒競隨吾後不知其意何也

雲生海溼初飛雨日漏山椒旋作晴箬笠芒鞋橋下路
兒童爭逐放翁行

書喜

堪笑龜堂老更頑天教白髮看青山家居禹廟蘭亭路
詩在林逋魏野間略計未嘗三日醒細推猶得半生閒

今年況展南湖面朝借樵風算可還

時方有朝
命復鏡湖

書房雜書

歛版一何久懸車已後時狂醒醒始悔窮獨老方知世
外乾坤大林間日月遲猶須采藥去不媿鹿門期

又

面槁髮鬢鬢衰殘百不能夜房侵戶月晨硯滿池冰藥
債多於酒蔬餐薄過僧年深拄杖折自斫澗邊藤

寒夕

夜扣銅壺徹旦吟了無人會此時心燈殘焰作孤螢小
火冷灰如積雪深風急江天無過雁月明庭戶有疎碁
此身畢竟歸何許但憶藏舟黃韋林

讀經

半升粟飯養殘軀晨起衣冠讀典謨莫謂此生無用處
一身自是一唐虞

讀史

民間斗米兩三錢萬里耕桑罷戍邊常使屏風寫無逸

應無烽火照甘泉

讀劉蕡策

志士仁人

一作人人

氣薄雲唐家惟有一劉蕡看渠放逐蛇

龍手那肯驅蠅與拍蚊

雨霰作雪不成大風散雲月色皎然

數間茅屋寄蓬蒿天遣來歸息我勞月可一庭陳素練

風酣萬木起驚濤病侵齒髮才雖盡酒挾江山氣尚豪

安得人間掣鯨手共提筆陣法莊騷

韓文公以騷配莊古人論文所未嘗

也及

中夜苦寒

困窮全素節
羸老愈剛腸
報國永無日
飯蔬那自傷
布衾如鐵冷
冬夜抵年長
推枕歌梁甫
中庭月似霜

示子孫

為貧出仕退為農
二百年來世世同
富貴苟求終近禍
汝曹切勿墜家風

又

吾家世守農桑業一挂朝衣即力耕
汝但從師勤學問不須念我叱牛聲

早梅

東塢梅初動香來託意深
明知在籬外行到却難尋

縱筆

晨炊躬稼米夜讀世藏書
俯仰無多媿心知死有餘

又

破困供飯足陋屋著身寬
小蹇勤芻秣時時一跨鞍

歲暮雜感

衰髮如枯管殘齒如敗屐取米鬻薄糜便足度晨夕欲
知死遠近不必訊龜策四序忽已過如數楸雙隻發裝
陌上亭具食水邊驛會當一日歸豈有終作客

又

天風吹雪片大者如飛鷗豈惟平溝坑直恐糴馬牛百
錢買新蒸千錢贖褐裘雖無狐貉溫要免溝壑憂小兒
為我言幸可具杯甌園蔬亦復佳過足翁豈求

又

歲盡霜雪稠相望僵萬木天豈私梅花獨畀此芬馥高
標我自有何憾老空谷人言和羹實晚或參鼎餽哀哉
世論卑汙我塵外躅誰能湔袂之寫真配修竹

又

我少雖嗜書賦性實慵惰初志略未訓白髮已無那吾
兒猶好勇世事如棄唾呻吟編簡中徹旦或未卧爾來
愈自勵日讀易一過勉終大學功吾道要負荷

自責

晨起登堂正幅巾蕭然聊欲養吾神
凡心未免更詩字習氣猶思議
古今買僞為登山寺去徹燈緣愛月窗新
何時一切消除盡終作無懷上古民

懷舊用昔人蜀道詩韻

曩自白帝城一馬獨入蜀晝行多水湄
夜宿必山麓時聞木客嘯常憂射工毒
蜿蜒蛇兩頭蹉跎夔一足豈惟耳目駭
直恐性命促稍歷葭萌西遂出劔閣北
奴僵不

敢訴馬病猶盡力我亦困人客一日帶屨東最憶蒼溪
縣送客一亭綠豆枯狐兔肥霜早柿栗熟酒酸壓查梨
妓野立土木主別意益勤我去疲已極行行求旅店借
問久乃得溪聲會歌長燈焰照影獨村深寒更甚薪盡
燒簣竹須臾風雨至終夕苦漏屋於時厭道途自誓棄
微祿猶幾三十年始謝祝史職予四竊祠祿乃謝事君思念篤老
內閣使寓直亦思秋毫報力憊蓺黍稷却尋少時書開
卷有慙色

出遊

僧院軒窗酒市樓過門自入不須留恰來竹下尋棋局
又向沙邊上釣舟詩放不能諧律呂書狂猶足走蛟虬
秦碑禹窆風烟外一弔興亡萬古愁

辛酉冬至

今日日南至吾門方寂然家貧輕過節身老怯增年

俗鄉

謂喫冬至飯
即添一歲

畢祭皆扶拜分盤獨早眠惟應探春夢已

繞鏡湖邊

冬至後一日書

霜霰新冬後年齡大耄時功名久無夢文字略存詩丘
壟歸何憾琴書付有兒癡人癡到底更欲數期頤

客至

何處軒車客能來桑麥村一奴先入市此老自應門野
果嘗皆澀村醅壓尚渾殘年亦何恨治世作黎元

子聿入城

小硯寒生凍孤燈翳復明衰翁守微火稚子隔重城日

落林無影舟行水有聲詩家忌草草得句未須成

降魔

老閱人間久曾降百萬魔悲憂誠害性喜悅亦傷和省
事常須勉忘懷得最多當年未知此無奈月明何

冬日

故里躬耕後頽齡耄及前開門無客至得句有僧傳忽
忽身如夢迢迢日似年會當乘小雪夜上剡溪船

又

客至惟清坐真貧不是慳援琴排遣悶合藥破除閒引
鶴時穿屐逢梅一破顏怪來寒徹骨夜雪冒南山

客去

相對蒲團睡味長主人與客兩相忘須臾客去主人覺
一半西窗無夕陽

自勉

妄出真成錯歸耕惜已遲褐溫貧始覺飯美淡方知身
外元無易情中自有詩窮源那得止瞑目以為期

又

自信直如弦殘年偶得全老猶嗤佞佛貧亦諱言錢旦
算勤鞭策塵埃痛洗滌仍須語兒子此事要家傳

又

臂弱傳鈔少心煩記問衰讀書猶自力愛日似兒時章
句分無憾聲形講不遺明年幸強健閉戶有餘師

又

歸老寧常逸時時學荷鋤室雖無長物圃尚有餘蔬壯

志誠衰矣貧居亦晏如為農當世業安用築門閭

午晴至園中

老不禁寒起每遲出門蕭散午晴時春回九地梅先覺
霜賈千林竹不知藥圃采苗芒屨涇石泉照影角巾歌
歸來未過西簷日袖手悠然獨詠詩

七姪歲暮同諸孫來過偶得長句

雨墊林宗一角巾蕭條村路竝煙津四朝遇主終身困
八世為儒舉族貧行摘殘蔬循廢圃卧聞飢雀噪空囷

封胡羯末皆佳甚
剩喜團圞一笑新

苦寒

終日頻添季子裘
經旬不上仲宣樓
摩挲酒榼雖堪喜
疎索梅花未免愁
正苦冰生退吟筆
却思雪作潤耕疇
乘除擾擾殊多事
獨擁青氈覓睡休

閒中書適

棋廢機心息
書捐美睡多
客來時淡話
酒後亦高歌
甚欲江湖去
無如老病何
平羌半輪月
依舊照漁蓑

又

乞得殘骸久天涯一禿翁
瓢分春瓮綠甌絕太倉紅
短褐便冬暖長歌樂歲豐
老腰那可折步步賴枯筇

復湖

世事相尋敗與成湖中畚
鍤浩縱橫共知陂壞行當復
敢恨臺高既已傾

小隱山園在湖中近聞亭觀皆廢

天鏡忽看孤月墮

樵風長送片帆輕下臨萬頃如雲稼
從此年年有頌聲

梅花絕句

體中頗覺不能佳
急就梅花一散懷
衝雨涉溪君會否
免教塵土浣青鞋

又

高韻知難折
簡呼溪頭掃地置
芳壺梅如解語應
惆悵昔日名流一箇無

又

折得梅花古渡頭
詩凡却恐作花羞
清樽賴有平生約
爛醉千場死即休

又

疎枝冷蘂誰能畫楊叟江西舊擅名今日東窗閒拂拭
去人一尺眼先明

跋馮氏蘭亭

堂堂淮陰侯夫豈噲等伍放翁評此本可作蘭亭祖

唐古

石刻本

又

繭紙藏昭陵千載不復見此本得其骨殊勝蘭亭面

山中

舊本山谷有句云
俗書喜作蘭亭面

十二月二日夜夢與客竝馬行黃河上憩於古驛
竝轡徐驅百里中雲開太華翠摩空是間合有神靈在
七十餘年路未通

又

河濱古驛闢重門雉兔紛紛黍酒渾吾輩豈應徒醉飽
會傾東海洗中原

倚樓

初三日

暮雲細細鱗千疊
新月纖纖玉一鉤
歎息化工真妙手
衝寒來倚水邊樓

讀書

先親愛我讀書聲
追慕慈顏涕每傾
萬事到前心盡嬾
一編相向眼偏明
致君正使違初志
為己猶當畢此生
更祝吾兒思早退
雨蓑煙笠事春耕

讀史

夜對遺編歎復驚
古來成敗縱橫功
名多向窮中立

禍患常從巧處生萬里關河歸夢想千年王霸等棋枰
人間只有躬耕是路過桑村最眼明

閒遊

已破梅花一兩枝竝溪穿塢每歸遲老軀健似中年日
鄉俗淳如太古時上疏清狂非復昔據鞍矍鑠欲誇誰
一端尚被鄰翁笑無事長吟費撚髭

日暮

樸學無闕道廢興更堪衰與病相乘眼看白日西南去

繩繫膠黏總不能

省事

老去終年卧草廬
事皆省盡略無餘
塵留鼠跡猶嗔拂
風作瓢聲固不除
興發舊醅何害醉
詩成拙筆亦堪書
投牀睡美悠然覺
作計今知本不疎

雪中作

鬢毛無奈歲華催
一笑登臨亦樂哉
平地忽成三尺雪
遶湖何啻萬株梅
雲山疊疊朝憑閣
簾幙沉沉夜舉杯

節物鼎來方自此酥花綵勝待春回

夢韓无咎王季夷諸公

積雪欲照夜老雞方唱晨諸公逝已久幽夢忽相親話
舊慙懃意追歡見在身悠然又驚覺撫枕一悲辛

晴窗讀書自勉

今日雪始晴遶舍烏烏樂老來少睡眠雖病亦早作豈
無案上書可與共寂寞弦歌始風雅次第窺灝噩高明
仰河漢曲折窮脉絡唐虞誠未遠洙泗亦如昨委佩聞

都俞避席承博約膏肓幸施砭幽閔欣納鑰天全魯壁
藏不墮秦火虐吾生百世餘其敢負所託

冬夜讀史有感

短檠膏涸夜將殘感事懷人興未闌酌酒淺深須自度
圍棋成敗有傍觀斷糶作飯終年飽大布裁袍稱意寬
世上閒愁千萬斛不教一點上眉端

大寒

大寒雪未消閉戶不能出可憐切雲冠局此容膝室吾

車適已懸吾馭久罷叱拂塵取一編相對輒終日亡羊
戒多岐學道當致一信能宗闕里百氏端可黜為山儻
勿休會見高岑律頽齡雖已迫孺子有美質

自詠

滿梳晨起髮凋零亭午柴門未徹局萬事忘來尚憂國
百家屏盡獨窮經楠枯倒壑雖無用龜老搯牀故有靈
夢裏騎驢華山去破雲巉絕數峰青

十二月十二夜夢
實有此故識之

晚興

斲芋挑蔬自鬻羹
雪簷收滴算寒生
不嫌終日無來客
時聽荒園斲木聲

雪後寒甚

日破重雲出
春從淺步來
未融樓北雪
先綻水南梅
屏護清吟硯
缸鳴乍熟醅
平生羨李愬
入蔡夜銜枚

雪晴步至舍傍

雪消還似雨
冰釋旋成泥
視菜荒陂北
尋梅小塢西
牆陰新犢卧
庭際午雞啼
幽興殊無極
歸來日已低

訪隱者

湖曲有隱者時時容叩門人如釣渭叟地似避秦村笑
語囂塵遠衣冠古製存山寒歸路晚相與盡瓢樽

村野

村野易過日閉門心自欣一身猶逆旅萬事固浮雲病
厭詩為祟閒憑酒策勲灌園雖舊業隨事不須勤

初夜

初夜多幽興危闌偶獨憑月墜星盡沒風勁雪重凝身

似遊邊客心如退院僧
奇寒不可耐歸對北窗燈

雙松

父老言紹興中所植

東岡天矯兩蒼龍
千尺蟠空黛色濃
六十餘年松若此
誰知我更老於松

兀兀

兀兀孤村客悠悠
兩世人夢忘身潦倒醉覺膽輪困
故里簪纓換都門巷陌新
聞臨安火後興葺漸畢
餘年猶有幾撫事

一傷神

殘厯

殘厯不盈紙苦寒侵弊裘歲猪鳴屋角儺鼓轉街頭未
死猶當學長貧肯復憂雪晴農事起且復議租牛

戒言

饒舌憂患始銘膺勸戒深談空摩詰默對酒子光瘖久
已忘齊語何嘗解越吟悠然嫌未足更撫絕絃琴

聞松風有感

重位每憂身後罵虛名不救眼前飢直須采藥名山去

日夜松風無歇時

遣興

侯印從來非所圖
赤丁子亦不容呼
著低怯對新碁敵
量減愁逢舊酒徒
生世豈能常役役
酣歌且復和鳴鳴
扁舟到處皆吾境
莫問桐江與鏡湖

又

家住城南剡曲傍
門前山色蘸湖光
三朝執戟悲年往
二頃扶犁樂歲穰
名姓已隨身共隱
文辭終與道相妨

子孫勉守東臯業小甌吳粳底樣香

有道流過門留與之語頗異口占贈之

萬里縱橫自在身偶然來看剡溪春
取將月去閒娛客攜得雲歸遠寄人
縮地不妨遊汗漫移山隨處對嶙峋
須君更出囊中劍一為關河洗敵塵

閒記老境

謝事久懸車為農嬾荷鉏破裘寒旋補殘髮短猶梳槁
木忘榮謝閒雲任卷舒心知老當逸先罷夜觀書

又

嫌鬧不入市怕寒稀出門擁爐愁兀兀投枕睡昏昏柳
色新如染梅花香滿村猶嗟未免俗薄酒誑空樽

小飲梅花下作

脫巾莫歎髮成絲六十年間萬首詩

予自年十七八學
作詩今六十年得

萬排日醉過梅落後通宵吟到雪殘時偶容後死寧非

幸自乞歸耕已恨遲青史滿前閒即讀幾人為我作著

龜

門外野望

十二月二十五日

野迴浮煙碧門深反照紅柳邊雙鷺渚天際萬鷗風僧
唄家禳疫神船社送窮豐年隨處樂忘却鬢如蓬

自題傳神

識字深村叟加巾下版僧擔挑雙草屨壁倚一烏藤得

酒猶能醉逢山未怯登莫論明日事死至亦騰騰

僧頌云今

日騰騰任運明日任運騰騰

歲暮貧甚戲書

阿堵元知不受呼忍貧閉戶亦良圖曲身得火纔微直
槁面持杯祇暫朱食案闌干堆首宿褐衣顛倒著天吳
誰知未減麤豪在落筆猶能賦兩都

晚晴閒步隣曲間有賦

湯沐身輕念出遊近春原野霽煙浮樓陰雪在玉三寸
雲罇月生銀一鈎窮巷客稀常足睡算年詩退不禁愁
鄉鄰無事冬耕罷獨倚籬門數過牛

誦書示子聿

乃翁誦書舍東偏吾兒相和山之巔翁老且衰常早眠
兒聲夜半方泠然楚公著書數百編少師手校世世傳
我生七十有八年見汝任此寧非天

又

易傳三聖至仲尼炎炎秦火乃見遺經中獨無一字疑
正須虛心以受之世衰道散吁可悲我老欲學無碩師
父子共讀忘朝飢此生有盡志不移

十二月二十九日夜半雨雪作披衣起聽

臘雪瑞豐登春雨相發生二者皆可賀愛此打窗聲披
衣起靜聽蕭蕭亂疎更豈惟肺渴蘇耳目為一清孤燈
不結花相對翳復明明朝遂除夕歲月驚崢嶸

辛酉除夕

衰境遇白雞自分墮幽墟造物偶見寬俯仰復歲除駸
駸迫耄期凜凜無根株孰知尚堅頑壯者有不如銅瓶
垂碧井手自浸屠蘇松煤染兔頰秉燭題桃符登梯挂
鍾馗祭竈分其餘僮奴歎我健却立不敢扶新春無五

日節物傾里閭羅襜插紗帽一醉當百壺

除夕

六聖涵濡作幸民明朝七十八年身門前西走都城道
卧看無窮來往人

劍南詩藁卷四十九

欽定四庫全書

劔南詩藁卷五十

宋 陸游 撰

開歲

綠襦新畫衛門扉
賀剌相欺可累歎
賣困不靈仍喜睡

送窮無術又來歸
相尋蠶市人何在
爛醉蠶津事亦非

惟有禹祠春漸好
從今剌判典春衣

蠶市成都正月初故
事蠶廟津在眉山

亦邦人正月
宴遊之所

箕卜

孟春百艸靈古俗迎紫姑厨中取竹箕冒以婦帚襦豎
子夾扶持挿筆祝其書俄若有物憑對會不須臾豈必
考中否一笑聊相娛詩章亦間作酒食隨所須興闌忽
辭去誰能執其祛持箕昇竈婢棄筆臥牆隅几席亦已
徹狼籍果與蔬紛紛竟何益人鬼均一愚

梅花絕句

幾年不到合江園說著當時已斷魂只有梅花知此恨

相逢月底却無言

又

當年走馬錦城西
曾為梅花醉似泥
二十里中香不斷
青羊宮到浣花溪

又

聞道梅花圻曉風
雪堆遍滿四山中
何方可化身千億

一樹梅前

一作花

一放翁

又

小亭終日倚闌干
樹樹梅花看到殘
只怪此翁常謝客
元來不是怕春寒

又

亂蓼桐帽花如雪
斜挂驢鞍酒滿壺
安得丹青如顧陸
憑渠畫我夜歸圖

又

紅梅過後到緗梅
一種春風不並開
造物無心還有意
引教日日放翁來

立春前一日作

壬戌開歲
四日立春

開年化日已舒長
漸見風和鳥變吭
冒土萱芽抽嫩綠
拂橋柳色弄輕黃
重溫壽酒屠蘇釀
探借春盤餅餌香
不入城門今幾歲
遙知車馬正匆忙

立春日

日出風和宿醉醒
山家樂事滿餘齡
年豐臘雪經三白
地暖春郊已遍青
菜細蒺藜花宜薄
餅酒香浮塋瀉長
瓶湖村好景吟難盡
乞與侯家作畫屏

送子龍赴吉州掾

我老汝遠行知汝非得已
駕言當送汝揮涕不能止
人誰樂離別坐貧至于此
汝行犯胥濤次第過彭蠡
波橫吞丹魚林嘯獨腳鬼
野飯何店炊孤櫂何岸檣
判司比唐時猶幸免笞箠
庭參亦何辱負職乃可恥
汝為吉州吏但飲吉州水
一錢亦分明誰能肆讒毀
聚俸嫁阿惜擇士教元禮
我食可自營勿用念甘旨
衣穿聽露肘履破從見指
出門雖被嘲歸舍却睡美
益公名位重凜若

喬嶽峙汝以通家故或許望燕兒得見已足榮切勿有
所啟又若楊誠齋清介世莫比一聞俗人言三日歸洗
耳汝但問起居餘事勿挂齒希周有世好敬叔乃鄉里
豈惟能文辭實亦堅操履相從勉講學事業在積累仁義
本何常蹈之則君子汝去三年歸我儻未即死江中有
鯉魚頻寄書一紙

正月五日出遊

久作閒人不慣愁新春天氣更清柔未為遼海千年別

且繼斜川五日游細柳拂頭穿野徑落梅黏袖上漁舟
此身定去神仙近倚遍江南賣酒樓

六日雲重有雪意獨酌

遍遊數澤一漁舸盡歷風霜只緼袍天為念貧偏與健
人因見嬾誤稱高地連海滋濤聲近雲冒山椒雪意豪
偶得名樽當痛飲涼州那得直蒲萄

閒甚戲作

酒盡枵樽腹書拋委架塵漸能閒過日始覺老催人玉

塵王夷甫金龜賀季真若論方外事終媿葛天民

莫笑

莫笑窮閭叟人生亦已稀衆中容後死險處得先歸初服還韋布晨飧美蕨薇牀頭周易在捨此復疇依

初春雜興

戲續春寒賦閒賡午醉詩煎茶小石鼎酌酒古銅卮曝日龜浮沼營巢鵲墮枝村深無客過幽興與誰期

又

水長鷗初泛山寒茗未芽
深林聞社鼓落日照漁家
渡遠呼船久橋傾取路斜
客愁慵遠眺不是怯風沙

又

問途來野店秣寒憩山郵
何處無詩思平生慣旅愁
翩下鷗鷺點點散羊牛傳
入王孫畫千金未易酬

又

故歲愁聽雨新春剝得晴
暖催紅蘂開漲入綠池平
遊馬行爭路華燈賣滿城
江村獨無事戶戶及時耕

又

老病倦遊陟偶尋溪友期殘冰擁魚笥新暖入柔枝山
崦巨然畫煙村摩詰詩何人為收拾媿我不能奇

春曉

喔喔雞號野昏昏月挂樓夢隨殘漏斷愁伴宿醒留壯
士看清鏡春寒著弊裘拂窗新柳色最憶錦江頭

書感

投老羈孤久臨觴感慨頻關河疎舊友風雨敗新春事

固少如意天終能勝人所悲頭上髮不與柳條新

壬戌正月十四日

老子居然健上元如許晴湖平波不起天闊月徐行散
髮漁舟穩臨風野笛清安能擁笳鼓萬里將幽并

十五日

誰推圓鏡上天東桂影婆娑滿鏡中天宇更無雲一點
譙門初報鼓三通兒童州州杯盤喜鄰曲紛紛笑語同
逐祿豈能無聚散明年誰復伴衰翁

高枕

高枕閒看古篆香
世間萬事本茫茫
偶亡塞馬寧非福
太察淵魚恐不祥
每與諸兒論今古
常思百世業耕桑
危機正在黃金印
笑殺初心繆激昂

送施武子通判

初入修門鬢未秋
安期千里接英遊
退歸久散前三衆
邁往欣逢第一流
只道升沉方異趣
豈知氣類肯相求
龍鍾不得臨江別
目斷西陵煙雨舟

老學菴自規

堯德被四表其本在身修江河水稽天發源乃消流人
忍於博蝨習熟且解牛象箸與玉杯漆器實其由斯須
失兢畏惡名溢九州始乎為善士終可蹈軻丘孰置汝
太山孰擠汝汚溝降福孰汝私得既孰汝讎聖狂在一
念既福皆自求易簣汝所知垂死勿情偷

雨夜

斷岸輕煙著柳條孤村小雨夜蕭蕭荒雞隔浦聲相續

短燭無風焰自搖
朴學元知縻歲月
殘生竟是老漁樵
最憐鬢畔千莖雪
日日春風吹不消

子聿以剛日讀易柔日讀春秋
常至夜分每聽之
輒欣然忘百憂
作長句示之

朱顏已去鬢絲稠
知復人間幾歲留
正可牀頭著周易
安能車上說春秋
齋鹽日昃從兒好
弦誦更闌解我憂
時發一言常中理
絕勝問事不能休

記夢

信命從來不問天
經旬無酒亦陶然
夢為估客揚州去
水調聲中月滿船

夜賦

八十衰翁久挂冠
今年無酒敵春寒
亂雲入戶雨方急
斷雁叫羣燈未殘
蠹簡幸存隨意讀
蝸廬雖小著身寬
吏離自笑心猶壯
憂國憂家慮萬端

杜叔高秀才雨雪中相過留一宿而別口誦此詩
送之

久客方知行路難關山無際水漫漫風吹欲倒孤城遠
雪落如蓀野寺寒莫挈衣囊投土室晨沽村酒挂驢鞍
文章一字無人識胸次徒勞萬卷蟠

曉賦

雞晨非一鳴鴉旦每三鳴萬物各有役吾生何所營書
編猶未掩窗紙已微明穉子勇過我琅琅誦易聲

雪後龜堂獨坐

丈夫自重如拱壁安用人看一錢直簞食豆羹不虛受

富貴那可從人得讀書萬卷行媿心幽有鬼神為君惜
龜堂樂處誰得知紅日滿窗聽雪滴

又

兩手龜坼愁出袖閉戶垂帷坐清晝朝陽破雲雪漸消
點滴無窮聽簷溜士生百行雖相補第一要能安飯糗
詩書幸可教兒童勿使後人憐晚謬

又

牙齒欲落何足惜爛齧藜羹自堪食屋穿不害氣吐虹

客至從驚瘦如腊天公鑄汝亦已至春風裂面雪三尺
濁醪傾罷仰屋歌尚友孫侔與徐積

又

閉門屋漏不可居出門雪泥深尺餘興闕已回剡溪櫂
路滑罷借東家驢竹窗兀兀無與語澆愁賴有酒一壺
眼花耳熱睡至夜吹火起讀殘編書

二月一日作

狼籍梅花委道傍山櫻已復占年光簷消積雪時聞滴

衣覆殘爐賸得香老馬已哀寧識路寒龜未死且搯牀
柴荆終日無來客賴有陶詩伴日長

過東鄰歸小憩

籃輿過鄰曲綠野喜新晴暖日生花氣豐年入碓聲
陂鄉竭作買犢戶深耕歸舍還尋睡殘書傍枕橫

寄呂子和南廂

聖代多名德君家不乏公還看短袍綠來蹋軟塵紅小
忍便無事力行方有功官閒能念我時寄尺書東

自述

藜藿安貧陋柴荆俯莽蒼露著朝筮易掃地晝焚香美
睡天教嬾長歌客恕狂歡然送餘日醉死亦何傷

呂氏子夔郎求詩

乃祖身兼將相崇諸孫玉立有家風此郎已復塵埃外
它日相期氣類中行已勤勤須自省讀書疊疊要新功
果能哮吼如獅子一瓣香應嗣放翁

新晴

兼旬不雨亦常陰一日新晴抵萬金
浦面波紋春縠細
橋頭柳色麴塵深
關山滿眼愁千斛
歲月催人雪一簪
猶有強寬懷抱處
午窗睡起聽鳴禽

晚步湖堤歸偶作

酒盡知難折簡呼
出門仍苦要人扶
殘梅委地香誰惜
歸雁穿雲遠欲無
日落牛羊猶被野
農閒畚鍤正開湖
還家寂寞西窗晚
旋燎枯枝擁地爐

春來食不足戲作

飢臥誰能羨屬饜高懷飽食豈容兼外司祿在終難取

卿監致仕當得分司祿
須自請乃給遂置之

束帛恩深獨不霑

頃有赦令賜
致仕者束帛

羊酒卽獨
格不行

哀謝形容無藥駐犇馳日月欠膠黏兒童拍

手看翁醉山杏溪桃簇帽簷

散步湖隄上時方濤湖水面稍渺瀰矣

老覺人間萬事輕不妨閒處得閒行西山鳥沒莫雲合

南浦隄平春水生孤操不渝無鶴怨淡交耐久有鷗盟

先民幸處吾能勝生長兵間老太平

邵堯夫自謂生於
太平老於太平為

太平之幸民彼豈知幸哉若予生
於亂離乃老於太平真可謂幸矣

老學菴

老學衡茅底秋毫敢自欺開編常默識閉戶有餘師大
節難危見真心夢寐知唐虞元在眼生世未為遲

春晚

強尋殘夢苦難成推枕搯藤繞舍行新漲生波漁艇活
晨曦送暖客衣輕煙迷芳艸蒼茫色鵲占高枝嘯喈聲
老病自憐猶嗜學誦書家塾羨諸生

新館一客諸孫晨
興入學誦書頗盛

龜堂雨後作

澤國春多雨，龜堂病少悰。
雖名舊朝士，其實老耕農。
一點葦間火，數聲煙外鐘。
詩材故不乏，處處起哀慵。

書感

我欲哭窮途，所懼世俗驚。
出門復入門，掩淚且吞聲。
唐虞邈難繼，周孔不復生。
承學百世下，我輩責豈輕。
楊墨斥已殫，釋老猶縱橫。
拔本塞其源，力盡志未平。
吾道如皦日，薄食終必明。
一木雖獨立，可支大廈傾。
夷風方變夏。

孰能作長城卓哉易簣公垂死猶力行

後書感

貧賤終身志不移閑關涵泳賴書詩唐虞未遠如親見
周孔猶存豈我欺力學正須忘寢食少年誤計事文辭
爾來朋友皆雲散考質從誰盡所疑

村居書喜

紅橋梅市曉山橫白堦樊江春水生花氣襲人知驟暖
鵲聲穿樹喜新晴坊場酒賤貧猶醉原野泥深老亦耕

最喜先期官賦足經年無吏叩柴荆

中春偶書

鄰曲祈蠶候陂塘浸種時春寒新炭覺雨霽鼓鐘知驢
瘦衝泥怯魚驚食釣遲哀翁一味嬾耕養媿吾兒

夜泊

小聚近江干中春尚爾寒釣船隨鷺宿煙月伴鐘殘冉
冉歲時速茫茫天地寬推篷一搔首無處著悲歡

東岡櫻桃已過殊不知

病著寒侵怕出門蕭蕭煙雨暗江村一樽闕與梅花別
過盡櫻桃不足言

別嚴和之

器之魂逝已難招尚有和之慰寂寥今夜月明空歎息
想君孤棹泊溪橋

又

千里風煙行路難旅舟應過子陵灘人間富貴知何物
莫負君家舊釣竿

齋中雜題

湖水日益長柳色日益深好鳥西山來飛鳴過前林年
華挽不留陳迹曠難尋花開少共賞酒熟惟孤斟王謝
今編氓曲水空山陰一樽欲弔古已矣子何心

又

屯雲失南山三日吹細雨歲月不貸人鼃聲遽如許一
年復一年老至不可禦下溼病在脾餘息僅如縷枯皮
裹瘦骨半屬松下土屋壞要當顛安能强撐拄

又

書生每苦飢得飯已可賀黃齋三百瓮自是天所破有
時尚不繼得米無暇簸昨者雪塞門煙絕但僵臥雖云
迫溝壑老學不敢惰夜分喚隣翁我歌爾當和

又

西窗日過中飢坐生眼花援筆課小詩墨燥字傾斜須
臾忽滿紙翩翩若風鴉雖無古人法簡拙自一家乃知
雨漏壁未媿雖畫沙俄報豆飯熟投筆喜莫涯呼童拾

澗薪試我家山茶

春晚

萍葉青浮水蛙聲鬧徹明川雲時聚散天氣半陰晴杏
子爭梅結鳩巢後鵲成吾儕亦有役過社更深耕

社日小飲

人生當惜老年時醉插山花壓帽欹世事恰如風過耳
微聾自好不須治

山茶

雪裏開花到春晚世間耐久孰如君憑闌歎息無人會

三十年前宴海雲

成都海雲寺山茶開故事宴集甚盛

春夜

寂寂春將莫迢迢夜未央膏殘燈焰短杵急藥塵香困思樓雙曉羸軀寄一牀養慵新有味初志悔軒昂

春遊

右軍不復見清真賞會猶須我輩人幽夢斷時雞唱曉短章成處鳥呼春出山茶筍村墟鬧上市尊鱸匕飭新

速覓一壺隨處醉
風吹紅紫半成塵

北窗睡起

杏梢紅溼晝初長
睡過窗間半篆香
久厭客遊歸自好
本無才術老何傷
依蒲不去羣魚樂
點艸還驚小蝶忙
堪笑放翁無一事
強將詩句占年光

北窗懷友

中年妄意慕軒雄
白首終希尺寸功
落落要居流俗外
兢兢恐墮異端中
仰天俯地猶多媿
飯豆羹藜已過豐

幸有北窗堪講學故交零落與誰同

舟中作

娥江西路石帆東身寄鷗波浩蕩中
疊疊沙痕留浦岸疎疎日影透漁篷
詩人無復同盟在酒債何時一洗空
已迫耄年宜易感人生五十即稱翁

又

晤語無人與遣愁出門聊復弄輕舟
山穿煙雨參差出水赴陂塘散漫流
隔葉雄雌鳴谷鳥傍林子母過吳牛

數家清絕如圖畫炊黍何妨得小留

湖村春興

桑柘相望雨露新桃源自隱不緣秦稻陂正滿初投種
蠶子方生未忌人酒借鵝兒成淺色魚憑雲母作脩鱗
賽神歸晚比鄰醉一笑猶關老子身

鄰餉

結隊同秋穫連牆聽夜春薄持聊共飽熟啜却煩供炊
玉吳粳美浮蛆社酒釀時平多樂事莫饜數從容

久雨

風雨連旬日，屢空猶晏如。
敢言苔及榻，僅免釜生魚。
齋糝朝供鉢，松肪夜照書。
百年如此過，作計未全疎。

登山

困厄身垂老，登臨意未平。
莫煙迷艸色，宿雨壯溪聲。
往古飛鴻沒，浮名脫髮輕。
平生五字律，自笑尚關情。

讀易

大易中含造化機，王何元未造精微。
乾坤要自吾身看。

臥聽雞鳴起索衣

村居書事

四十餘年食太倉賜骸恩許返耕桑
長絲出黼尊羹羹白雪翻匙稻飯香
酒戶知貧焚舊券醫翁憐病獻新方
春殘睡足東窗下聞道長安依舊忙

又

藥物枝梧病漸蘇門前野老笑相呼
春深水暖多魚婢雨足年豐少麥奴
小飲杯盤隨事具閒行巷陌倩人扶

題詩非復羌村句誰與丹青作畫圖

李伯時有羌月圖傳於世

春晚書村落間事

千古會稽城閭閻樂太平豐年觀米價霽色聽禽聲俗
儉憎浮侈民淳力釣耕幽詩有七月字字要躬行

雜興

秦漢區區了目前周家風化遂無傳君看八百年基業
盡在東山七月篇

又

義和分職授人時斷自唐虞意可知獸舞鳳來餘事耳
西成東作要熙熙

又

老無添處仍逢病春欲殘時未減寒架上漢書渾忘盡
牀頭周易却常看

又

一身逋負愁縣酒滿眼關山海上樓子細推來惟合睡
五更風雨已如秋

又

面顏日瘦口眼大氣血頓衰鬚髮擗不用凌煙寫冠劍
一蓑煙雨事春耕

又

故交零落形弔影陳迹淒涼口語心辛苦一生成底事
祈招空解誦惜惜

南堂獨坐

晨坐南堂雙眼明南山山色滿柴荆片雲忽過失簾影

急雨初來聞竹聲
鸚鵡螺深生酒興
蟾蜍滴古助詩情
野人頻約天台去
幾緗青鞋了此行

春雨示鄰曲

春來天氣苦蕭森
如縷雲升便作霖
寒溜何曾住一滴
綠陰忽已遍千林
萼絲箭茁垂垂老
蓼浦菱塘灩灩深
聞道南山花尚在
約君攜酒試同尋

讀書

堯庭君相都俞盛
闕里師生博約深
我讀殘編食忘味

朱絃三歎有遺音

新晴賞牡丹

杜門睡榻長蒼苔
滿眼新晴亦樂哉
小市忽逢尊菜出
曲欄初見牡丹開
不嫌雨後泥三尺
且趁春殘醉幾回
自揣明年猶健在
東箱更覓茜金栽

茜金近出
牡丹名

對酒

神仙豈易學富貴不容求
百歲儻未盡一樽差可謀
鐘鳴上方晚桂發小山秋
處處多幽趣攢眉勿浪愁

病起遇晴有作

十日春雨霑百疾投間作呻吟雖甚苦飲啗尚自若筋
骸則已疲正氣亦消鑠行年垂八十所恃豈在藥魔軍
累百萬指顧可盡縛君看仁義師何至用韜略川雲忽
破散平地見日腳無人畫此翁縹渺立孤鶴

定命

定命元知不可移更兼狂疾固難治履穿衣弊窮居日
齒豁頭童大耋時耕釣詩多悲境熟功名夢少感年衰

今朝雨歇春泥散
剩伴兒童鬪草嬉

假山小池

鑿池容斛水
壘石效遙岑
鳥喜如相命
魚驚忽自沉
風來生細籟
雲度作微陰
便恐桃源近
無人與共尋

又

蓮嶽三峰峙
桃源一路分
池偷鏡湖月
石帶沃洲雲
魚隊深猶見
禽聲靜更聞
巖幽林箐密
疑可下湘君

春欲盡
天氣始佳
作詩自娛

浮雲飛盡見青天
拄杖閒拈瘦倚肩
漸喜綠秧分擺極
又看畫柱圻鞦韆
雞豚雜遝祈蠶社
鼓笛喧譁競渡船
惟有此翁無一事
閉門贏得日高眠

自詠

生艸覆蝸廬
長鬚駕鹿車
貧猶思施藥
老不廢觀書
登覽攜童稚
歌呼和里閭
躬耕亦何得
聊以遂吾初

西村勞農

川雲散盡十分晴
繚出溪頭信意行
片片飛花隨步遠

金分四庫全書
卷五十一
離離芳艸上牆生村深日暖單衣爽路轉沙平兩屨輕
脯肉芬香坊酒釀因來聊得餉春耕

題廬陵蕭彥毓秀才詩卷後

詩句雄豪易取名爾來閭澹獨蕭卿蘇州死後風流絕
幾許工夫學得成

又

法不孤生自古同癡人乃欲鏤虛空君詩妙處吾能識
正在山程水驛中

舍北溪上垂釣

大耋還家萬事非
垂竿好在綠苔磯
風和山雉挾雌過
村晚吳牛將犢歸
春漲新添塘灩澦
夕雲仍帶雨霏霏
此生自笑狂顛足
依舊人間一布衣

三月二十二日作

雨過艸爭出
溪湍魚逆行
輕舟摘蓴菜
小市聽鶯聲
萬事已無夢
一樽猶有情
吾兒能講學
不必說無生

劍南詩豪卷五十